



JUDICIAL SYSTEM MONITORING PROGRAMM
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Tribunál Distritál Oe-Cusse
16 Outubru 2014

Tribunál Distritál Oe-Cusse kondena pena tinan 10 prizaun ba arguidu kazu abuzu seksuál ba menõridade

Iha 09 Outubru 2014, Tribunál Distritál Oe-Cusse kondena arguidu ZL ho pena tinan 10 prizaun tanba provadu komete krime abuzu seksuál ba menõr ne'ebé sei idade tinan 3. Kazu ne'e akontese iha 02 Feveireiru 2014, iha Distritu Oe-Cusse.

Ministériu Públiku akuza katak iha 02 Feveireiru 2014, arguidu lori foos ho na'an fahi ba iha lezada nia uma. Momentu ne'ebá lezada nia inan fase hela bikan iha uma kotuk no sei kolia hela ho nia laen iha hela Dili liuhosi telefone. Iha momentu ne'ebá lezada haris no halimar hela bee ho kondisaun molik. Hafoin lezada nia inan ba foti roupa foer iha kuartu laran no hateke ba kuartu sorin nia hare arguidu toba hela iha lezada nia leten. Aktu ne'e rezulta lezada sofre kanek iha orgaun seksuál.

“JSMP preokupa teb-tebes tanba JSMP haree kazu barak involve abuzu no violasaun seksuál hasoru labarik iha fatin hotu-hotu. Tanba ne'e JSMP ezije ema hotu liu-liu instituisaun relevante sira estadu nian atu proteze no prevene labarik sira hasoru krime hanesan iha future,” dehan Diretor Ezekutivu JSMP, Luis de Oliveira Sampaio.

JSMP hein katak pena ne'ebé aplika ba autór kazu violasaun seksuál ba menõr sira bele hatudu ema seluk katak violénsia hanesan nee hasoru labarik nunca aseitavel no evita ema seluk hosi komete krime ida ne'e. Elementu sosiedade hotu-hotu iha obrigasaun atu salva labarik sira hosi kualker forma violénsia hasoru labarik sira.

Durante prosesu julgamentu arguidu konfesa integralmente ba faktus sira ne'ebé ministériu públiku akuza ba arguidu. Tanba ne'e tribunál, deside atu la persija rona deklarasaun husi testemuña ne'ebé mós hanesan lezada nia inan.

Ministériu Públiku akuza arguidu bazeia ba artigu 177 Kódigu Penál kona-ba abuzu seksuál ba menõr konjugadu ho artigu 182 alinea (a) kona-ba Agravasaun. Iha alegasaun finál hosi ministériu públiku husu pena tinan 10 prizaun, entretantu parte defeza husu ba tribunál atu fo justisa ba arguidu.

Bazeia ba faktu hirak ne'e, tribunál kondena arguidu ho pena tinan 10 prizaun lolos kedas ho ministériu públiku nia alegasaun finál.

Prosesu julgamentu leitura akordaun ne'e prezide hosi juis kolektivu ne'ebé representa hosi João Ribeiro, ministériu públiku representa hosi Dr. Ambrosio Rangel Freitas no arguidu hetan defeza hosi Dr. Afonso Fatima Gomes hosi Defensória Públiku.

“Kommunikadu imprensa ida ne'e bele imprimi tan ho apoiu jenerozu husi povu Amerikanu liu husi Ajensia Estados Unidos ba Dezenvolvimentu Internasionál (USAID) bazeia ba Akordu Kooperasaun ho Númeru AID-486-A-13-00007 ba programa Ba Distrito iha Timor-Leste, ne'ebe nia implementasaun lidera husi Ajensia Counterpart International ho nia parseiru sira. JSMP mak responsabiliza tomak ba konteudu no hanoin iha komunikadu impresna ida ne'e nia laran no la nesesariamente refleta USAID ka Governu Estados Unidos Amerikanu nia opiniaun”.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone:3323883 | 77295795

Website: www.jsmp.tl

Face book: www.facebook.com/timorleste.jsmp

Twitter: @JSMPtl